

畸

堂

摘

藁

倚堂摘藁卷之十五

書啓

與翁長卿一

少別遂復逾年信問希闊望風增慨三月六日
禮部報至為足下喜躍獨至非苟以利達為足
下榮足下休養聲實踐蹈仁義造次儒者以待
時命而果有聞於世此為善慶異乎安私朋比
拳拳之情也 國家開設羅網以待賢者比歲
獎右浮靡天下從風遂使老成道棄此於世道

誠非小係不圖里選孝廉復見今日公及良用
皆號君子千里而一士是比肩而立今一邑而
得君子二以此知海內有人也時時接見釋卿
問足下動止知頗不諧俗有辭尊居卑之意竊
爲足下計非便也僕曩歲初嬰世務不堪羈束
竊有鄙陋以諗足下足下厚戒僕以淺中謂去
褰裳者無幾乃今顧不能爲大人稍安耶無事
特異亦不詭隨優遊歲月以俟常調可以無咎
今之教職苟卑無耻秩微屬下動遭呵譴以足

下高朗簡亢必不堪此進士選除應是大府大
府必當通道足下視吾杭三館博士日率弟子
員奔走諸司奏進簡牘月凡幾矣退與士大夫
周旋卒無寧時即有不至人亦望之此其勞苦
畏人不在京師庶僚下足下謂教官可於繩墨
外求乎願與良用深計之居常論議不為迴忌
處世寧復可爾內有所主外宜慎默賢人君子
以是為周身之防幸留意僕釋禪在孟秋計來
春得會京師諸不備

與翁長卿二

不奉晤語旬歲去冬寄家書寓東長卿願假留
數日期以人日不至而長卿行書未至長卿先
發矣僕迂疎不適時用不幸入世網而又在冗
曹心事糾紛不可解理非對足下終未得一吐
憤懣此僕所以願一見也昨見除目知已授工
部昔者潘安仁讀汲長孺傳歎司馬安四至九
卿良史有巧宦之目而自傷其拙以官伐不進
為拙之効安仁諂事倖戚以佞市寵其不為雅

士明甚而猶言若此不知當時巧者如何也言之可為悲咤嗟乎長卿畜之可與知者道也勉盡職事無貶無亢僕與足下皆未能脫屣微祿資朴忠與物無競亦足以自安僕之役事大可歎息公知之無俟予言也恨恨舍弟在京得所依托幸甚良用時時相見否閉門讀書朋友過從謁候希少是亦拙者之為政也承差去草草附此屬牋啓繁夥不暇一一

與孫伯泉仲泉

奉違三時矣佩服德愛未嘗暫釋誠慕義深至
非詡詡飾虛辭相娛悅也今朋友道喪胥教誨
敦故舊置不講久矣而門下昆弟獨孳孳為之
應元於世迂踈無當而門下昆季獨收之以為
可教此與嗜昌歎羊棗何異取與當否所不敢
知然應元之為私感宜何如也季泉想已到浙
東矣舍弟族處辱旦夕顧拂此尤銘刻第恐不
一意問學仰負明教為可憂耳諸郎君玉立蓬
麻之附固已得所然嚴師之益季泉雖不在京

師竊望二丈不淺也偶有差便草草布此外舍
第書一緘敢勞從者一致之不欲去人知舍第
所在也幸垂諒

與王德仁侍御一

吳山一別遂復三時瞻企道光何勝戀慕某伏
承至愛軼於常分骨肉之厚無以復過鄙陋之
愚心固時時在左右而道左便稀萍跡不定竟
不得一啓候動定竊意旌節赴任當在此時敬
伺河澣庶幾幸遘如是者月餘不知乃已抵治

所矣伏惟吾兄古道古心竟與時忤左遷僻郡
計不終歲而休光盛節追軌往哲雖暫否塞而
道益光大蟻屈者一時不朽者無窮庸俗之觀
兒女之寵無足為兄戚戚也郡中少事伏想道
養愈益隆厚夫鬱遏蓊勃斯又所以發之盛大
而鎬揭惟兄道德日進而某日沒沒也可為愧
歎便中冀有以教之幸甚幸甚拙言數章皆所
以抒寫悒鬱窮愁呻吟之詞奉去一笑不宣備

與王德仁侍御二

旬日再奉教札開誨勤至及諭遭讒被謗因緣
所自雖遭顛躓而猶惓惓不忘夙昔兄之用心
可謂厚矣幸甚僕樹立無素不能取鄉曲之譽
又稟賦愚闇率情任真不能呶訾伊嚙與兒女
子爭巧慧外為自憙而蒐隱隱賊以相誑給此
誠世人之常度而僕之所不足也兄之有取于
僕豈不以斯哉僕承先人緒餘束髮受書竊窺
古人之跡今三十年矣血氣就衰志意頽墮混
混與庸衆人處固未嘗有卓特詭異之稱也兄

過取之以爲可與耳而僕內之則德義虛薄無
中孚盈缶之素外之則操行庸鄙無允顯昭灼
之觀故使惡聲流聞謗毀叢集脩之實難隳之
甚易尚何言哉然計未但已夫志義不立故名
譽不聞志義立而名不聞乃可過之朋友是以
謗議歸于下流僂郵起于增積蹤跡之間僕實
忽之又豈可尤人耶夫正色出辭則悖慢斯遠
勤而葺之耕而獲之沃本而求實增膏而希光
自顯庸也即不能懷仁輔義建瓌偉非常之業

以流惠當世垂休方來猶將托志儒雅附于介
士扣角商歌若出金石思原憲季次之所履求
仲舒楊雄之所以澹泊無營盡精墳典苟不厭
死而已矣兄視僕平生豈嘗遊聲譽好勢利求
奇贏與世人同所甘樂者哉又豈能睢盱舔舐
詘曲王公之門幾無端功名者耶僕之鄙素兄
既察之矣僕本貧家上有老母素無畊桑之業
家乏紀綱之僕不能脫屣微祿以挂世網昔聶
政狗屠也猶幸日有甘臠以奉朝夕黃叔度牛

醫之子茅容田野之賁耳咸能砥節脩行竭力
養母見重於當世取異於名友而僕力耕不可
積著無訾兄第二人皆爲士人而使堂上恒憂
朝夕僕寧可復爲人耶所不能唾去者徒有此
爾而事又有不得盡然者僕既不可無祿先人
之服既闕赴部謁除不幸而擢冗曹承乏祗役
非可辭免黽勉從事遂在于此薄命所遭安所
歸咎兄以爲僕之心事如何哉上之不能發奮
蹕厲越庸俗之末議蹈令哲之高軌以勉樹聲

實下之不能依阿傳會取當世之所謂休顯以
炫耀里中之兒小人之所訕笑君子之所不與
僕復何心尚忝祿仕兄雖履困不如僕之前後
跋躓也此事既竣則將拂衣東歸以求初志舍
第漸知事庶幾干祿以養母耳布衣蔬食聊以
卒歲種樹灌園可以求日苟有餘暇亦將方羊
翰墨之林游心道術窺挾微眇高可希游夏下
不失退之此亦僕夙昔之求懷也不敢遂以絕
於世苟其無知則終焉而已爾鬱鬱蓋久寡與

歎歡聊復一發以當對談幸勿訝其不遜來教
謂俗眼視人無足較計惟知自省此道願與兄
共之不敢不勉僕行年三十有五竊不量力未
衰嚮往極吾生之所之死則已耳若乃時世之
所低昂讒夫之所閔構此亦螽蟴之過耳要之
公論久乃定耳邸報久不得見北方試錄所見
者山東順天耳僕此月望間皆在信州若兄可
到安仁僕當輕舟趨謁得盡披露如何如何倘
以為可幸差人一示十三日無使者到則遂東

耳諸不一

與王子長曹長

違教遂復數月瞻企聲光何勝悽悽僕顓固無
類徒以志頗慕古辱收門下去歲之冬朝夕必
俱博我以瓌觀示我以周行僕雖不肖敢懈佩
服服役以來心恒惴惴恐一旦負明教干大戮
黽勉旦夕動得咎過喟言長謠可為知者道也
比者興居何似劇談佳會得如曩時否僕擾擾
無足道偶便輒布候諸惟為道自玉不宣

與蘇提學

曩歲某猥以州吏得承役臺下深惟庸鄙以不稱職穢黷按章為懼遭家閔凶不克終事斬焉墟墓之中過不自量免於罪戾而塵薦牘聞報驚惕莫知所由某疎矣駸慙不能脂膏隨人于世寡與而門下越拘攣之議有奇僻之嗜使昌歆羊棗列於邁豆某於分涯誠非所宜堪然而感激矜奮不能自己以無因緣未得詣前披胸臆近者濫竽工曹承役于此而門下方以道執

純備奉 命為大邦宗師某因是謂得拜下風
承餘論宿留旬日值憲節巡試郡縣云返未期
歧望門墻豈勝勞瘁某竊觀漢世名賢推引後
進門生故吏為所成就咸有令名某之闇劣敢
進於是期於砥礪不負明教耳臨發聊寓書冊
泉君所少陳固陋瞻奉有時當期傾悉時下清
和伏惟興居駢祉不宣

與李汝實

五月間一奉晤語忽忽至今歲且暮矣與足下

兄弟不相見者十年幸一因緣會邁謂當窮日夜連時月殫恫素極驪悰抽抑過之積思振恢奇之眇論浹高深之玄覽究道術之底致恣心縱意屬厭而止此僕夙昔之蓄念亦足下翩翩惠來之盛厚也曾不信宿浩然西歸昔蒙叟以不知絕談呂生以相思命駕今惠施云觀嵇叔非厭僕之三緘曾未發口而足下剡中之權已復意盡鄙陋邑邑何可盡言使來復承札教示我裏悵殷勤甚厚以足下之才行宜論雋於澤

宮講議于石渠豈在今日乎而主司不求真才
郡國不預推上使茂實弘朗之士猥殿於浮茸
此天也人者所不得與人之所能自脩而已假
令古賢人君子之不遇者與當世休顯輕銑之
士較其所得與所垂於後者豈可同日語哉而
足下年方壯志嚮卓然求為古賢人君子無難
也努力修植無隊前緒二者蓋可兼得若乃饑
寒困窮天所以成就增益之甚厚其在往古無
不皆爾無足為足下戚戚也東行誠有意否錢

唐固足下舊游之地夏且盡僕當北上因與足
下泝淮泗道齊魯周游勃碣之間登郭隗之臺
求鄒子環恠曠慌之論以發竒抱振雄藻于兩
都蜚英聲于上國覽黃圖窺紫宮一吐憤懣以
破沉錮豈非壯游哉足下幸有意乎否也若不
欲遠涉一為吳游中夏而別亦僕所至願敬因
使者口陳願賜欬唾舍弟順天幸有名不自意
得之也尊君大人伏想清吉幸一道鄙陋閣山
兄亦復蹉跌令人短氣不及具啓并此致悃諸

諒之不具

與吳泉亭祠部

奉違左右遂已踰時仰企愛私何勝悽悽伏承
令器擢藻詞林紹嘉名父昔向歆以經義相討
論三蘇以文章為師友前史歎美乃見于斯竊
伏江陬無任欣忭比日伏想道履清嘉南都履
任定在何日君子出處衆人所望夫居則蹈其
素履往則都其榮號動不失機行不詭道想慮
之久矣不復一一伯生釋卿復遺瑱贖志士惜

景光可為歎息小第應亨得陪明仲之後此又
鄙人私幸也草草布悃外粗絹試錄引賀惟垂
照不宣

與蘇提學

某獲幸於門下十年於茲矣見每後則愛益愈
於前時豈以某之道為有加耶其無乃先生并
容之德以久故為厚耶某迂愚無術志頗慕古
為人棄久矣先生古人也乃獨有取於某以是
竊喜願附於賢者不自知力之不足也年餘不

復望見顏色固陋蒙鄙日益甚先生其何以
終惠教之李生春芳想已進見矣發蒙之德及
於豚子感何可言附謝惟照察不宣

復萬五谿先生

某遠遯門牆迨今十載前歲便道過大賢之里
雖得捫趨稍聞緒論而役事促迫即復東行自
茲奔走南北兼以積愆家室多故遂不能脩候
動止竊伏省罪分在莫贖乃承長者先垂惠問
賜以佳儀撫念優厚慙赧感刻豈勝區區伏惟

明公道業純備德望隆洽搢紳之徒咸謂宜在
三事折衝萬里而乃親枉聲光鎮緩邊鄙雖萊
公北門希文延夏前史故事不為左屈然我觀
之望實切都人之心矧被樂育而荷陶冶者乎
醜虜狝突畿輔震動而西厯晏然抒天子右
顧之慮勲伐茂矣元今乃知禮樂詩書信禦侮
之具也幸甚幸甚使者返敬此布謝諸惟為天
下元元自攝不備

與翁長卿

夏杪奉違忽茲玄月山川修阻延想為勞遠惟
閒宴游處之樂近思曹署聯事之美勸德拂違
期相追琢誠願無時去左右也比年以來旣異
職守兼值變故趨走南北聚處益寡雖復時一
合舛旋即分背日遠德義悶然不見已缺偷怠
委靡讐過增積已猶知之人其謂何退食一室
之中時攬經史尋義未得復為事撓出與借人
交同觀異趨城守深固櫟如拘繫當此之時思
與足下及伯生等偃仰古今開口論天下事屬

厭而退安寐不訛何可得也捉筆屬文心意騷
亂終不能就思有所得轉口他語隨復遺忘自
少時見柳子厚書時謂有此以為不然乃今信
古人言不妄也積累枯寡家禍洊至六年之間
兄弟父子皆罹閨慘老母高年屢哭幼艾弱子
煢煢遠隔萬里志業未就而搖蕩其情使之焚
然無所抵泊諸孫孩穉誰軫誰視每一思及未
嘗不紳竦肉駭也足下亦兩經禍變當復知此
不爲謬語伯父大人遠想萬福嗣子進業否足

下禪期在何時伯生及德章于喬諸人時時晤語否閒時幸以此書示之以見情抱不能各致啓札也奴贊歸草草附報不盡願言

與來南峯年伯

元讐言釁增積貽禍家門令孫女孝敬有恪而櫟天不延在遠聞告悲痛無已靜言思之不祥自元伏惟伯父大人鍾念獨至痛割尤深繫以職守無由奔慰元豈勝懸切惟昔子禹視元猶弟不鄙寒薄締以姻好子禹之子元視猶子也而

不義不慈存撫無素羸疾茆然遂成奄忽追惟
夙昔以慚以悲藐諸遺孩誰相軫視每一念及
神爽飛越茲遣奴賚歸致薄奠弔省徬兒及三
稚等輒令走慰堂下申此下忱元旣不能自抑
哀情然猶願伯父節思捐愛以天自釋不盡願
言

與外舅書

元儻釁增積貽禍家門佳婦殞喪弱子孑然無
所依止在遠聞訃悲痛無已伏想岳父岳母軫

念旣深哀閔為甚係以職事奔慰無由元無任
懇切六年以來內子背違悲懷未輟荐罹凶咎
仍襲閨慘貌諸遺孩誰軫誰視眷言興望涕旣
隕之且元年踰四十獨有一子血氣未定志意
初立而俾之棄家室之樂執悲哀之情去居業
之安縱羈曠之迹穉幼牽係來就靡能遷轉無
期往撫不可徘徊四顧不能奮飛伏惟岳父岳
母念其伶俜時與開釋令之捐無益之悲游情
術業進德寧軀以慰化者元之至願也特遣奴

贊走慰堂下諸惟厚攝以安遠懷不宣

與保寧郭二守

使來伏承教札并示瑤篇諷服尋繹非惟宏藻
炫爛駭心奪目而雅尚玄思矚然涅而不淄所
以昭耀蒙鄙祛釋塵錮者不訾之惠也欽承何
已欽承何已渝州解纜遂已逾月瞻望盛義願
言從之職事拘牽但有耿耿竊意玉節東指元
得因緣披侍盡此拳拳側聽風聲日復杳默乃
茲承教知成虛佇耳未見君子勞瘁如何使者

逐敬布鄙陋外拙言一部奉上請教伏惟台照
不具

與成都任節推

元因緣年誼亟辱收教遂至弛棄城衛示我周
行淵厚醇懿誠非謏謏者所能窺覬萬一杪秋
草堂再接餘論蒙鄙固陋祛釋良多驅遣東還
不復望見顏色傷離慕德未置于懷旬日再奉
教札指示勤至相厚之情銘感無已君子之度
式如金玉當世之所欽重也如元蟠木根抵自

分淪棄久矣然一言先容則輪困離詭為萬乘
器元雖不佞辱在久故之中矣公亦安能無意
哉公亦安能無意哉重慶吏返聊布鄙懷按節
川東尚得傾寫夙素不宣備

與孫季泉中允

都門奉別忽復歲盡傷離慕義瞻企為勞元迂
踈特予邈焉寡徒愚不知所趨賴兄收教稍得
比數於人二十年來日見親愛掩瑕督過幸不
為明時棄人况賜優厚中心藏之惟兄淵粹浚

明東修潔白道旣光大而勤葺無已行且持國
之秉當軸處中利澤施於民聲實流于後而元
苟竊榮祿無所著白靡然隨風終當泯泯仰企
盛義蹙然以慙然區區之懷未肯但已雖遠在
萬里猶跂望明教惟兄不遂鄙斥時賜指示幸
甚幸甚比者伏想伯母大夫人萬福兄泊伯仲
扶持清吉為慰令器令姪又復左紉何也少年
茂異三歲一推上未為後時積累深厚輝光日
新道之所貴也郡僚公委之京草率附候不盡

願言

與李湫南

首春侍教累日燕咲劇談傾倒畧盡臨貺敝邑
謂得少罄鄙私而草次分背歎負至今瞻企風
儀但有耿耿日月邁邁聿茲新秋伏想撫理多
暇德澤旁流某竊被餘教觀法良深幸甚幸甚
兵憲公蒞達州已久某以候分巡公未至頗稽
徃謁且待給由批示也茲分巡公甫過而給由
事竟未得要領以是月六日發白帝詣達州專

人走報臺下草次布愚不盡願言

與南姜泉

不奉晤語再涉秋矣追惟曩時聯事比局某最
不肖而辱追琢夾持不至顛踣繫公之賜佩服
不忘春來兩奉手札獎進勤至某之愚鄙何敢
望我公萬一然奉長者之教期以周旋不敢失
墜也貴使返已具啓謝不復一一專差吏人走
致下忱瞻企風儀無任欽戀不宣備

與郭二守

渝州一承緒言忽復旬歲風雅楷則寤寐未忘
比日伏想道履清慶為慰撫理多暇時御翰札
高文大篇輝照遐裔便中幸不吝教及何如某
俗務糾纏竟復棄置無足為大雅道也吏去便
草草布候伏惟照察不宣

荅楊守備

違教歲餘傾慕無已鴻才遠畧果諧夙期遐討
不庭敵王之慄析圭儋爵此其階也草深木
茂氣候煩燠想苦戎事橫槩賦詩適文壯節足

以厲將士之氣據憤盈之懷便中不惜寄示何如不宣備

謝撫公啓

某本以非才叨備屬吏方期展布四體仰稟弘規竭分於涓埃効愚於萬一樹立無素官謗紛羅長當退就棄捐老死丘壑伏蒙臺下施鴻恩於不報昭獨見於群疑嗟枯吹生雕腐飾穢俾幽隱蒙曦光之照輪囷得根柢之容垂白老母旣免於憂疑束脩之士皆勤於砥礪則雖所謂

剖心折肝相信豈足道哉至於接以燕私賜之
符傳進退以禮途旅不驚其為私感奚啻銘刻
竊念應元結髮受書粗知趨向暨乎從政不敢
怠荒才靡逮於中人志頗存於古昔身遠與寡
莫為之先而獨蒙越拘攣之議馳域外之觀使
枯楊復莢白骨更肉應元苟未即死敢懈進脩
期不負德於二天貽玷於知己而已首夏遠遠
堦墀江行阻風季末方達敝里承差岳正東等
還虔附啓謝下情無任瞻戀懷懷之至

與翁夢山憲長

使來伏蒙手教拜拜腆遺旣慰所思兼釋憂鬱
何幸何幸樹立無素謗議紛羅渙忍迂踈分甘
擯斥耿耿此心尚期無負公議知我鮑子非公
而誰詢知季月當弭節江臯瞻奉有期不勝欣
躍所命敬令所親管幹想使者能道之草草布
覆伏惟台照不宣

與張秋渠僉憲

瞻侍連日旣慰饑渴失而撫念之薦惠顧之勤

申以燕私開以篇詠所以破窮愁而祛豪錮甚
厚旋就遠隔增此離憂握手劇談不復知是何
日眷言瞻望豈勝區區使者遠護還草草布謝
諸老先生傾蓋蒙愛賤刺附謝乞轉致不宣

與趙雪屏都憲

南江妹丈來伏領手札書刻之惠仰辱教誨諄
切慰藉深至元無任銘感二十年來辱收門下
庸鄙無過人之能然亦不敢為不善慙不省事
自速官謗惟鄙陋愚心既不可人人告白門下

夙昔過與想無待吐露當能明本心耳我丈勲
庸德業輝映臺省 聖主宵衣旰食求賢如不
及鈞軸之任可翹足侍元竊備親知想望風采
踰於恒惴無任竚俟無任竚俟使者返草率布
謝伏惟台鑒不宣

謝張秋渠僉憲

元愚鈍人也初無卓特之行過人之才也與執
事一再會面即辱授契待以國士及今凡三奉
話言而弘獎益至親若肺附元何以得是哉執

事高朗諒直行藝明粹而遠棄清華隨牒遠方
此其操執有非凡衆之所及者元拙於進趣動
有齟齬執事之相取無亦以其氣味之近耶敢
不夙夜以副期許舟楫遠送江行孔安惠而好
我可謂深矣舟人返草草附謝不盡欲言

謝翁丹山年兄

乖隔歲餘得奉晤語已出望外至煩游徼遠護
江行孔安為賜實弘且侈矣使一故人過即斥
四兵為衛殆不可勝計然則兄於不肖可謂破

裕而元無乃竭人之力耶若乃燕惠之勤情好
之密有不假言謝矣銘刻銘刻旬有伍日乃扞
京口使者返草率附謝不盡願言

與何總兵

夙昔傾慕幸當領教左右而旋就擯遣未寫素
心雖不得接殷勤之懽然竊聞緒論及辱贈遺
續紛賜以符傳使行役者皆得領不匱之惠銘
感何已銘感何已江行六旬方扞敝里從者返
草草布謝仰惟台照不宣

與賈年兄

曩歲京邸一相合并旋即分背傷離慕義忽忽
數年願言瞻跂勞瘁如何惟兄鴻茂懋實昭布
中外聖明右顧中土得兄之重以開府耀兵
此誠河洛士民之慶也如第樹立無素招左速
謗自令若是無一可為兄道者茲舍親上舍張
浙去便草草附候殘暑漸退伏惟為道自攝不
宣

隋堂摘藁卷之十六

書啓

與蔡白石正郎

侯二谷曹長來遠傳翰示具悉念私京師雖日
有交接然不異離羣索居也琳琅在目豁然神
怡兩京綿邈不啻三千里披玩手墨諷服雅言
亦復何異對面幸甚幸甚承索僕近所爲文至
過許以僕類子長退之拜命汗縮非僕所敢聞
也往歲亦有意服膺經訓剽拾棄餘以飾固陋

見子長爲文魁詭雄傑退之淵渟蓄藏心並好
之然自以材鄙質難學術淺近行能未有以踰
於人采春華遺秋實當與猩鵠無異又徒求形
似過離本根將如貧兒之效富室姑不務耕殖
著居而徒效其服御肆設祗愈益困耳以此厭
棄不爲文章意且勤脩厥躬肆力問學俟於義
理有得然後時一發之幾免繡鑿虛車之誚又
比來人士淺薄退之好言漢魏蓋未覩其深厚
爾心竊未平之兄並舉馬韓淵詣卓見豈近世

豪傑所及哉二谷治山計相得歡甚曹署輝映
若此直是曠事而舍弟亦幸綴末行竊冀不扶
自直也二谷行冗次陳曾臆極草草惟照察不
宣

又

數年離闊得一合併惟時寇在門庭羣情洶洶
雖相對面猶千里也十六日出江口即發舟而
西家人送歸者亦不復能具一札留別不知兄
竟以何日去杭又是何時入蜀耳既至粵即若

絕國欲聞家信且不可得又得聞兄動定乎耿
耿入蜀後興味何似去春意想猶復作否一落
世網雖求退故是難事幸大人康強又樂觀兄
勲業之成願且安之何如某夙昔竊祿夔子道
慙良吏風謠泯沒諒無可道者第不審得免詆
訾否也水田年兄去敬附申候草次惟台照不
宣

答尹洞山春坊

某愚不解事趣向外時庸衆黯黯之中過辱收

教許以國士私心蓄藏未知所以致之汗赧而
已遠迹揚粵去京師數千萬里未能馳狀一洩
感奮之誠顧辱手札遠照荒裔至於獎借尤爲
過情諷服高義踧然加愧仰惟執事道藝純備
淵懿浚明脩士處子無不仰跂休光延佇一日
持秉正色處中當使巖穴魁壘耆俊之士有盱
衡吐氣之望如某譏諛自宜退屏草野老死無
聞惡有所蓄藏挾持可自炫暴如尊教所與也
悚息悚息令壻行遽簡慢殊甚輒附謝不敏漸

入溽暑伏惟爲天下勤攝不宣

寄蕙鹿園都督

隋堂之集閱有間矣海島殘孽尚稽天誅而中原盜賊蠡起雖聞撲滅恐餘燼未熄也公負經濟之略發憤懣憂時事義形於色今寇在門庭禍猶同室烏得偃息不一出引手救耶某遠迹荒徼頗以無事廢日真是竊祿近至蒼梧見浙中兩院移文委官召募狼兵蓋僉憲羅公建白也巡臺義不可沮已行該道選募矣狼兵猶豺

虎也驅之深山之中猶時出食人而可使入市
乎可憂可憂若只沿海營砦屯札勿使入城爲
害差小亦須薦紳大夫於當道處先其未至亟
陳此意可使勿到省城也敢以瀆於公伏冀留
神幸甚不宣備

上王中丞

思質

某夙昔誤被一盼遂蒙記憶姓名十餘年來復
得投好令器比部緣此再被延接奉違以來又
踰三時雖遠跡萬里而實馳情堦祀顧惟疎賤

不敢數通狀候某無任欽企杪冬漸寒伏惟尊
候動止萬福海島殘孽尚逋天誅致厓台慮近
蒙差人於粵徼召募狼兵某適以事至蒼梧得
於巡臺陳公處竊窺手札仰見明公忠誠懇惻
欲拯斯民於水火之中而置之衽席之上此功
一成非獨瀕海之民得蒙禔福實三吳甌越安
養生息之期也今年自春徂秋屢聞獻捷英風
宏略固已震懾夷貊重以憂勞不懈規深慮遠
斯狂寇不足平耳陳公既得尊教即欣然行下

談司議白已行左江道選募矣狼兵雖素號禍
賊所過殘破然以明公威德臨之當自斂手不
敢爲非愚意竊以爲彼旣自謂客兵或難盡繩
以法若止令於沿海營堡聽候指麾不必使至
城市則閭閻旣無驚擾殘寇漸可蕩平也因還
使便輒附悃誠草率塵瀆伏惟台鑒不宣

與謝與槐大叅

邇想殊切頃歲在山中得寄舍弟詩三章諷服
累日非獨格調清遠可以蠲釋悃吝而楚楚若

接神采披襟素併忘離索矣隨牒遠方合并未
期安得自致左右朝夕聆正始之音乎自關徂
浙猶是循常遷轉而海島小醜跳梁得假宏畧
廓清之實吳越蒼生之幸第恐區區一方不能
久專仁者之澤耳如何如何粵中兄施教地人
士猶能道說故事而梧岡松巖敬所及雪麓君
日日相聚聚則未嘗不談兄雅素憎懷思也茲
雪麓人便敬附啓候遽甚不能一二道鄙陋惟
台照不宣

與茅鹿門

使者至奉手教開示委至幸甚荒裔自鄙分所
安但迂愚疎戇非有石交時時夾輔恐未能免
過而兄與敬所次第遷擢流風衝波中竊懼不
能自立中心怒如非獨間闊願言之懷也河山
之間騷然多事當務者徒得公之重巡靖折衝
此最深計側聞風聲遠慰懸佇至如府江之伐
赫然在人耳目時俗雖好相抵譏然要不能奪
真是願勿以爲慮也某以去年六月上事自秋

徂春凡五至潯梧在省城不能匝月間遇東使
附問者三而再不達其一則去冬奴槐歸敬令
送致府上而兄又北轅矣不知終得達否顧屢
辱垂問慙愧慙愧所命事皆一一奉教如別紙
并收關附上巡院甫至冗甚不能一一道鄙陋
惟使者口悉之不宣

與御史大夫屠公

東洲

庚戌春言者以某蠹於班行宜就遣黜方是時
某在岷蜀萬里之外曾無游聲養交之素終鮮

肺附底裏之援如將號以擣鬼投之荒裔亦奚
以辯獨明公猥明本心深考素履抗言於朝終
得無負清議前年待次選部凡後至者皆隨到
隨得牽復而某獨連蹇歲餘始改授嶺徼當時
亦無以爲異者獨明公咨嗟太息頗亦見謂以
自守而歎當事者之未然也夫以某之迂愚不
適世用卽使老死草野亦何足道至於貞而名
之以污靜而詆之以躁將使束脩澡潔之士俶
儻扶義之夫解體不復肯砥節厲行勤身耆事

則所係亦若不小矣悠悠者豈以是爲意哉明
公曜獨見於沕沕之中別希聲於咬哇之日使
靜退者稍得吐氣此於世教非小小裨補扶植
之惠非某獨蒙亦不敢以爲私謝今天子所
倚注者獨明公高朗令終夷險一節而特立之
節正直貞素之風與李元禮魏玄成千古相望
凡海內深識之士無不瞻望進退以卜否泰非
復有待某進熟爲諛者即使若是亦有道者所
吐棄獨幸得爲大君子所與足用自考則竊歎

耿不能忘也勤修固陋之躬不敢墜失用此報
知已爾賡轉詳吏人去便輒布鄙誠并候萬福
伏惟台照不宣

與兵部翁侍郎

夢山

某行能無異舛時違俗顧用此見與門下而頃
年橫罹口語噂沓背憎苟非知舊來免猜阻執
事昭獨察於汶汶之中深明本心獎藉愈厚某
之積累豈謂足以孚於有道而大人者望隅而
知其中見微而信其著或宜流言之自止也夫

風流愈下毀譽隨聲一遭詆訾負愧永世何則
修之實難隳之特易斯束脩之士所以拊心泣
血長往之夫所以掉頭不顧者也嗟夫居今之
世不亦難乎而猶隱忍不卽引去者徒以束髮
受書頗存嚮往中歲入官亦欲隨時粗有建立
庶幾乎不朽之業而中道挫折默默至此立功
立言一無所效所以永夜不寐明發慷慨蓋猶
冀萬分之一也已矣時逝歲暮不可復竢矣曲
江之渌有薄田二百畝苟無水旱可以卒歲種

樹灌園沒齒而已矣垂白之年豈復能詰屈當
時與少年競尺寸耶執事抱明略逢聖主握
要執樞坐制驕虜天下想望廓清之效在此時
也某竊緣夙昔不敢自外敢畢愚悃夫世必資
才才宜豫蓄今天下雄俊卓犖倣儻扶義之士
亦往往間出而恥自衒鬻則寧有屏死草間耳
豈能自致於交戟之前耶夫不以間時旁求默
存一日有事思得不二心之臣與共憂公家之
務恐不能咄嗟至也某迂愚不適世用方圖引

去不復以干進為嫌故敢進此說又一入巖穴
聲迹俱當泯滅雖欲吐憤懣報知已不復可得
矣願執事無疑焉吏人賁用赴京之便輒附鄙
陋去歲辱專使遠護并申虔謝惟台鑒不宣

荅親友書

僕人至伏蒙惠教軫懷旣勤獎進尤厚并承慰
及老母旣矇之視復見天日親愛之至也不敢
忘不敢忘比日伏審道履清勝為慰廣右雖瘴
鄉無事而某之初莅適值多故夏杪涉冬凡四

至蒼梧躡歷盜區沿沂湍險較之蜀道又數倍
矣追惟聚處之樂茗飲相對時續濁醪楊稚古
今雜以談笑殆若隔世事矣孤羈不敢望遷轉
復奉清言難以豫定願言之懷但有耿耿小僕
返草草布謝惟尊照不宣

與王敬所書

某因緣年家之誼得於京師一瞻懿範然未旣
傾注萬一也不自意隨牒粵徼綴於末行當日
侍餘教非獨當官展錯有所仰式而講業論道

亦且得竊聽下風幸甚幸甚伏蒙翰教獎進尤
厚介使絡繹舟楫隨至某之疎非豈克堪荷孟
夏十有七日發舟錢塘迨茲廿有二日方至祁
陽水路登頓一月有餘擬於來月朔日或初三
日受事左右專遣來役馳稟指麾某性旣顚愚
投迹孤遠百所未達仰希指示懷抱縷縷統湏
面悉不宣

與翁冶山

僅至遠辱惠問得聞興居委悉良增馳想謝遣

應接日與簡冊相對自是樂事正復時時偃臥
娛精便體不失攝生之宜聞此幸甚人生貴適
意富貴旣非所願若復孳孳矻矻欲以誇俗流
後此亦與物役無異也至如靜玩經史時誦先
秦漢魏古文詞自是去塵溼遠矣諭及老母無
恙而舍弟顧多病疲薳至是聞之不寒而栗不
知今更作何狀也婚媾朋好兩家如一旦夕望
頻過軫視開誨如能遠絕雜賓閉關內視故當
有瘳若溺而不返恐無痊理與舍弟書亦言若

此此卽是萬金良方雖苦心爲陳之恐不能勇
從服食願公時爲強而進之得衰減一二分漸
望平復愚兄弟皆蒙公更生之賜也閔念至懇
中山南行想出無策可悲也不知今已還家否
性之承念及併爲我謝之草草

又

無祿舍弟早世伏蒙遠書垂慰悲感無已傷哉
計慮之不得生不能相就以居死不得相視以
訣也痛可言耶痛可言耶凡民有喪猶曰匍匐

救之老母年且八十罹此巨痛安可希冀無恙
而某嬰係世網不得即脫屣馳在目前相哀苦
天高不敢不跼地厚不敢不踏乃茲履之矣來
教開喻良至見寬安得不云爾某雖苟餘視息
固半死人也生平意望一日掃除都盡復何道
復何道伯譽稱孤子是也通家兒子未知向方
奄失所恃願提耳督教之幸甚汝貽得無妨業
否女兒伶俜念之傷心酸楚不復可一二道僮
歸聊布鄙情并謝存念不能親書惟亮察

與王子忠

無祿舍弟早世遠辱慰教豈勝悲感傷哉傷哉
老母白首惟此巨痛同氣四人兩在遠方獨有
仲妹得視續息僕聞計於梧州倉皇叫天肝胸
為裂四顧茫茫兀然一身不知世間有此荼楚
也遠惟妹氏愛鍾友于南江篤於懿親同此悲
懷而相隔四五千里無由聚哭以攄泄哀情痛
如之何痛如之何南江病體想益康強矣幸善
加調攝僕哀傷之餘僅餘視息無煩記念僮歸

草次布懷不能親書惟照亮不悉

上兵部張尚書

東沙

某不天遭罹閔凶不即殞墜仰厯台念伏承弔
幣遠及哀拊勤厚荼楚號泣之中腐心次骨自
惟無以克稱至懷萬一存歿感刻寧有涯涘某
自違台顏忽茲五載隨牒遠方無緣虔候起居
披陳悃悃乃顧猥存記憶仁卹有加追惟始終
成就之德豈勝慙負比日恭諭台候萬福殊慰
下悃齋夷之禍汔可小康補牢顧犬實惟今日

而未見有惕然憂深思遠者竊計非命世之才
無以戡茲禍難老先生龍臥蓋久安得不為蒼
生一出以底寧東夏耶某苟存視息未任捫趨
顛跂之愚不勝悽悽輒因虞君回附陳固陋瞻
望階祀無任欽道感德之至伏惟台鑒不宣

又

春首虞君至再奉台教并示雄文竢焉墟墓之
間奉此瓌觀不覺恫疚之暫釋而心目之一開
也幸甚幸甚夷寇禍難未已果如尊慮而北邊

警報日至尤異曩時事宰割者非特血指汗顏而已我公負四海之望先天下之憂亦烏得袖手旁觀乎樵雲釣海之論恐未得終遂也某苟存視息倏踰練期憂患存更日就衰薨年歲向暮而百無所成用愧負明教耳道泉歸草次附謝煩暑方盛仰惟爲天下珍攝不宣

與范東明憲長

使者返附上短啓幣儀想徹記室矣恭惟釋禪在茲北上有日庶幾瞻奉罄此離闕也時方多

難汽望小康自非命世之英無能戡定剥床之
災不啻同室兄宜遄出以弘濟斯人似未可夷
猶鄉國戀戀松梓也虞君回草率布悃惟爲道
崇攝不宜

理問所理問李金

閩庠生員黃中

高子車校刻

阿堂摘藁卷之十六終

水部稿序

水部稿者茗山許先生官郎署時
所著也嘉靖乙巳來守夔奉節令
趙君請刊之郡齋余辱先生之知
迺僭爲之序曰仲尼沒而微言絕
修辭之士人以所見爲說漢之西
京猶稱古雅其最著者賈誼司馬

遷相如蘇武李陵數人而已誼之
疏議遷之論敘相如之辭賦武與
陵之聲詩允矣傑作震耀宇宙然
亦以所長鳴未能兼收而並奏之
也迄諸唐詩號李杜文稱韓柳亦
莫不爾嗟乎嗟乎才難豈不然乎
先生以疏通之才恢之以博洽之

學大肆力于文思玄而韻遠理粹
而意精序事似子長論道如退之
古詩宗建安近體倣摩詰珠輝玉
潤兼諸家之所長殆猶麟鳳然世
所希產人所快覩矧斯集也發越
性靈嘉惠來學世宜珍傳固不可
得而秘也粵龔黃蜚聲循吏而乏

操觚之業沈宋著績詞林而非識
治之才先生文章宗工治益光美
昔人所難先生所易矣詩曰惟其
有之是以似之傳曰君子不器詎
不信夫詎不信夫

三台山人楊元長卿撰